

四庫全書

集部

欽定四庫全書

集部
金文靖集卷十

詳校官編修臣裴謙

中書臣劉源溥覆勘

總校官進士臣朱鈐

校對官中書臣楊世綸

謄錄監生臣田安仁

欽定四庫全書

金文靖集卷十

明 金幼孜 撰

書

書王修本先生遺墨後

右秦相李斯上秦皇逐客書一通總七百餘言臨川王
先生手筆也先生在鄉里以清才邃學早有時譽尤切
切篤好古文章故於先秦兩漢之文多手鈔之若斯書

其一也今先生去世已四十餘年獨此書藏篋笥中手
澤如新然觀其引筆行墨嚴密清潤自有一種風韻即
此可知其為博雅君子矣先生名務字修本卒年三十
二嘗以子英貴贈右春坊大學士兼翰林侍講學士云
書楊少傅陳情題本副錄後

予嘗觀先正范文正公生二歲而孤母謝夫人貧無依
再適長山朱氏洎文正貴以朱氏長育之德每思厚報
凡朝廷所加恩輒丐以逮之甚至朱氏兄弟卒皆為殯

葬歲時致祭享嗚呼文正存心若是之厚者其忠孝之大節豈不因是而可見哉今觀少傅兵部尚書兼華蓋殿大學士西昌楊公士奇其事殆與文正公同而存心之厚又千載而相符者也公生歲餘其先君子少傅公棄世賴繼父前進士羅君子理撫育教戒之勤後子理官德安坐累謫戍永昌卒二子長憲補戍役次京家居養母母卒亦坐累當種田北京時太宗皇帝親征北邊仁宗皇帝居東宮監國留公輔導公念憲兄弟不幸皆

以事遠役母夫人墳墓無所託具其情以聞意欲丐宥
京以歸奉歲時奠掃卒之感動淵衷親洒寶翰命永昌
軍役并免之觀公之追念其親逮於羅氏洎仁廟之所
以體臣下之情垂保全之德皆本乎人心天理之至而
曠古所無之典也何其盛哉距今二十年京來省公于
北京請錄當時題本以垂示羅氏子孫公既識之復出
以示予惟公以宏才碩學歷事三聖勲業在朝廷聲名
滿天下其位遇之隆倚任之重蓋有過於文正而其平

生出處之際存心之厚則未始有異也且世之人一隸
戎籍子孫往往貽累於無窮今羅氏子孫獲享安逸之
利若此者固荷朝廷恩德之大而實本於公忠孝之所
推也拜觀之餘敬書此於末簡為羅氏之後人尚世世
念之哉

書椿陰書屋卷後

太子少師壽椿公之子宗善質美而好學嘗於居第之
旁為藏修之所而名之曰椿陰書屋來求予言蓋將以

致警而進於道也余謂壽椿公以耆年碩德遭值聖德
致位顯融泊然以布衣自處慕道之心老而彌篤宗善
日侍左右講明問辨不出乎戶庭之間切磋琢磨近在
乎函丈之內本之以孝弟忠信徵之以前言往行致謹
於日用常行之間孜孜勉勉日求其所未知未聞者以
造乎高明廣遠之域以達乎賢人君子之地是則壽椿
公之所以為教而宗善之所以為學者也予辱與公游
且嘗識宗善喜能承公訓而進於學也故為之言宗善

尚勉之

恭題仁廟御書後

仁宗皇帝居東宮時尤重文學侍從之臣凡賜賚洎有所陳請必親為題識當時被其眷禮者不數人今有春坊庶子兼翰林侍讀學士王直其一也直永樂初科進士由庶吉士擢翰林修撰器識文學蚤已受知前後膺賜者三陳請者一皆仁廟親御宸翰題識批答者首則端午賜扇次則以直目疾賜藥次則直遭喪將歸賜白

金為道里費又其一則直以父在職年老乞致仕特勅吏部准所請其上皆著直姓名可謂極一時之顯者矣直謹裝潢為卷用彰寵貺以貽不朽俾幼孜識之伏惟永樂中太宗皇帝屢巡幸北京仁廟實監國事親賢納善惟日不足仁聲義聞播於四海凡直之得拜賜予者皆優禮賢士之盛典非私之也其允答陳請者亦事理之當然非過也夫賜隆於上而報勤於下者此古昔盛時君臣相與至意所以治化彰明休聞彌流而功業宏

遠也今觀仁廟之眷禮於臣下者既隆且厚而直之圖報於上者益勤以忠則上下之情交孚叶契可謂至矣然則是卷之藏固將以貽永久久豈圖一時之榮而已哉幼孜拜觀於斯不勝感激謹書此于後以識歲月云

書方兵部賓所藏文公先生遺墨卷後

紫陽文公朱先生以文章道德師表後世而平生尤用力於書所至皆有石刻其為字端嚴謹重未嘗肯為苟簡今觀兵部尚書方公得先生所書夙興夜寐四大字

墨蹟尤溫厚沉著展卷之間使人悚然加敬蓋先生為人辭氣雍容德性剛毅故其見於書者亦如此豈可以字畫求哉先生為此四字非以遺學者則以示其子弟其意欲以持敬為本蓋夙興夜寐必常加兢惕無一息宴安之意方能不失此言簡約而為訓切至擴而充之所以修身治家事上臨民以至于立功立事而成天下之務者何莫不本於斯公明敏而勤於政其於事上之道尤恭謹弗怠而又能視此以為規戒朝夕展翫其有

不惕然而懷敬畏者乎公其寶愛之俾後之人因是以感發興起則又當以公為法也

書獻陵宸翰後

嘗觀傳說之言有曰惟學遜志務時敏孔子之言有曰敏於行又曰好古敏以求之又曰敏則有功蓋敏者汲汲有惟恐不及之意君子之學所以成德所以建功立事未有不敏而能成者欽惟仁宗皇帝以天縱之資緝熙聖學弘偉光明超軼往古而其嘉言善行之著于天

下者皆足以訓後世嘗視禮部奏牘其後有主事馮智安名謂其義淺近無足致警遂更名為敏且題其外俾永守之無易敏感上恩之後謹以御書十五字裝潢成卷間以示臣幼孜請一言以識下方嗚呼天下之事敏則成不敏則廢自古及今賢人君子之立身行道何莫不本于敏敏之於人其功蓋大矣敏以薦方進秩為員外郎欽承聖訓身體而力行之夙夜兢兢礪其行修其職敏之又敏不以始終而有所間庶幾無負於仁考之

深眷而於鄉里亦重有光焉臣幼孜伏覲宸翰揆今六
易寒暑追思疇曩有不勝其感者謹書其後以歸之

九老圖跋

古九老圖乃東廣參政金華商君原迪之所藏也當有
宋元豐間諸老皆以大儒為天子左右股肱其勲業聞
望稱于天下及功成而退慕樂天故事相與置酒高會
以樂其樂遂圖形妙覺僧舍時人謂之洛陽耆英會今
去諸老已三百餘年而觀其衣冠儀刑雍容閒雅猶儼

然如生嗚呼其盛矣哉雖然賢人君子可傳於後者豈
惟其形似蓋亦有文章德業之著焉予生也後想望諸
君子風裁不能無高山仰止之思因商公求題有不勝
其感者三復之餘遂書以歸之

書梅花人物卷後

李伯時以白描冠絕當時後人莫之能及此卷以梅花
為主取六朝唐宋諸賢詠梅之詩摘二句并寫其人與
梅為一段其筆力精妙天機入神非惟得其衣冠形態

之似而其神氣意趣吟嘯自適之狀莫不畢備吁何其
至哉然亦不知其為何人之筆要知伯時之流亞與此
蓋刑部侍郎楊宗勗所藏以屬予題宗勗清雅修潔其
所好尚者意必有在雖然畫之工拙不足論也有若何
水部宋廣平蘇文忠黃魯直諸賢之休聲偉烈照耀簡
冊千載之下猶能使人歆羨而企慕之不忘則吾宗勗
之所好尚者其在於此乎詩曰高山仰止景行行止宗
勗尚益努力以先達自期待則他日所至固未可量也

展卷三歎遂書以歸之

書御製祭韓公茂文手卷後

太醫院使韓公茂故魏國忠獻王之裔幼承家學精通醫理為時所推重受知今天子遂為院使為人溫純謹愿不事表暴居職尤小心寅畏夙夜勤勞固有怠忽公茂既歿聖天子深用閔悼特為文賜祭超逾常品其子太醫院醫傳感佩聖製復命善書者以泥金書之裝潢成卷持以示臣幼孜俾一言題識其後於乎世之負才

藝者常患不得其時得其時又患其道之不能行若公
茂之遭值明時為聖天子所知遇道行志遂已極顯榮
一旦歿于官特申卹典聖心拳切復賜文以祭之光華
寵耀豈特為一時之榮誠足以昭示無窮增重於先世
矣傳尚珍襲之以為家寶拜觀之餘敬書此以歸之

書聖賢象卷後

昔嘗見蜀中文翁講堂及錢唐學舍皆有聖賢刻像往
往為人所摹揭千載之下仰而瞻之者莫不為之起敬

起慕則在當時得觀其儀容之盛所以感發而興起者
可以想見矣此象乃元錢選舜舉所圖今國子司業貝
公宗魯之所藏也公在成均以師道自任所講而習者
聖賢之經籍所則而行者聖賢之道德朝夕與諸生揖
讓進退雍容於進退之間其得于觀感者深矣豈象之
云乎哉因公求識其下方敬書此以歸焉

書聖賢象刻本

廬陵周添彰以聖賢象刻本裝潢成卷來求予題識其

後余謂君子之觀於聖賢也蓋將以求其道德之實察其動作威儀之則雖千萬世如將見之者漆彰居大學所讀者有聖賢之書所學者有聖賢之事所由者有聖賢之大道所依者有聖賢之廣居陟降於詩禮之庭揖讓於俎豆之區其得於觀感者必深矣夫豈象之云乎哉漆彰尚於此求之

書周克己所藏先賢畫象卷後

聖賢之道德文章具在方冊千載之下使人起敬起慕

者以此而已苟得觀其德容以挹其流風餘韻則雖未
獲親炙其門而所以得於觀感之間者將必有出於方
冊講誦之外者矣友人周君克已間以濂洛諸君子遺
象見示且屬予識之方展卷間衣冠儼然貌恭氣和端
拱雍容直若與諸君子相接而親覲夫儀容之美使人
鄙吝粗慢之氣頓然消釋亦何其快哉克已與予皆聖
賢之徒也尚取法於斯以求無愧於諸先哲則於平生
之所學殆亦庶幾焉詩曰高山仰止景行行止吾與克

已當共勉之

題顏真卿遺墨後

顏尚書翰墨在人間甚不多見偶觀此卷不覺毛髮豎
立嗚呼忠義之足以動人也果如此夫臨書三歎為之
敬仰

書釣臺圖詩序後

嚴故著姓漢高士子陵嚴先生後也由桐廬徙居石莊
凡二十餘世而至尚達豪爽有氣節能亢其宗今年春

訪余玉堂因與出酒夜酌談論契闊道舊故尚達慨然
念其先世與其祖父交游之盛屬予求名公鉅卿為詩
文以歌詠釣臺圖垂不朽其用心可謂勤矣余謂自三
代而下能不以富貴功名易其所守者惟子陵一人而
已其高風偉節猶可想見宜夫後世子孫之多賢而有
以自立也尚達圖畫釣臺追想富春以求無忝於前人
而思所以自立不以富貴窮達利害榮辱而變其志則
無負諸君子之所屬望而所謂圖垂不朽者不在于彼

而在于此矣尚達欲求予題識其下故書此以歸之

書樵雲卷

古之人有託于隱者但求其心之所寓不可泥其迹苟以迹求之則徒得其外而其中之所存者未必能得也是故心者其理也迹者其形也形之在宇宙間若日月星辰之照臨雷霆電電之震霍風雨霜露之變化河海山嶽之高深昆蟲草木之蕃殖與夫典章文物名器制度之宏博雖仰觀俯察萬有不齊然吾皆得撫而有之

然亦豈屑屑焉泥其迹哉蓋必有得其理者矣得其理則心之所寓者可得而識矣予友曾君學中脫略不羈嘗以樵雲自號以常情觀之樵雲特其迹而已而不知學中之處于此觀夫雲之斂舒上下沉浮聚散悠悠揚揚或行或止或往或來皆有至理者存而於是心有默契者焉若曰學中之樂夫樵與雲為徒優游歲月以自放於山林間者豈真知學中者哉學中持是卷求予題予故表而出之使觀學中者當觀其心不可徒求其迹

也

題周氏世直集

右文三通其一周君伯寬哀辭宋進士湜溪郭先生謨
其二元鄉貢進士周君墓表前翰林學士解公大紳謨
其三寶賢堂箴今兵部職方員外郎周君岐鳳前為漢
府紀善時謨伯寬為岐鳳之高伯祖以立其祖也周氏
世以詩書顯以直道稱當宋季權臣擅命伯寬仕直寶
謨閣忠憤激發屢上封事不報乃移書左史徐麒仲莫

欲相與匡救其失卒不見信棄官家居而宋亦亡哀辭
所謂危言切直直道三黜者也元至正初詔修遼金宋
三史以立時以鄉貢士會試京師不利久之被知者薦
入史館上書力陳當以宋為正統不合時論遂拂衣歸
卒之仕不偶時僅低徊學校一小官墓表所謂雖一時
廢不用萬世之下與日月爭光可也國朝永樂間太宗
皇帝選文學士為漢王輔導臣岐鳳以國子學正擢紀
善王所為多不法數諫不從王所居殿扁曰寶賢堂蓋

欲招致匪人為奪嫡計乃著箴諷諫王怒假他事請于
朝左遷為長洲教諭夫士君子明聖賢之學立身致用
固當直道事人不宜曲學阿世也而或有不能然者詎
非其理有未窮心有不正而承傳於家者之無本耶予
觀周氏若伯寬若以立若岐鳳祖孫五世同守一道其
賢於人遠矣伯寬以立雖未得大用於世而數百載之
下忠謹公誼皎然表白垂諸宇宙其視當時依阿取容
獲致美官者不啻霄壤之不侔岐鳳雖取怒所事然不

二十年王果覆敗削為庶人君方歆歷中外綽著時譽
年逾六袞登用未涯然則直道之行果何負於人哉信
乎其得窮理正心之學而承傳於家者之有本也嗚呼
偉矣君子敘為翰林修撰間托善書者以三文繕錄裝
潢成卷出示於予求識一言予感其事有關世教為題
之如此且以告夫周氏後人之繼承家學者

書彭修謨墓誌銘後

士之積學於窮困以有盛名享爵祿不幸至於大死而

不得以盡其才者吾不得而知也或者以為出於命非
乎不出於命而謂之天吾亦不得而知也嗚呼賢如顏
子猶且不幸短命於今獨不然哉此予於友人彭君汝
器所以重為之悲也汝器為人沉毅喜氣節重然諾與
人交歔然若不能勝者方其為兒時已能讀書有大志
稍長汲汲焉求師友以講求夫聖賢之學間為文出語
輒驚人鄉先生長者至折行輩與之為禮以為其成必
大得名也其後汝器第進士入翰林為侍從近臣其名

日顯天子嘗召試文章汝器操筆伸紙略不經意颯乎
若風雨浩乎若波濤而莫知其所止也由是益被嘉獎
其名又顯未幾扈從北京汝器偕予同行凡道路山川
馳驅登覽所以著之於詠述者其氣益壯然自是用力
之篤而其文益密矣曾未逾年汝器忽以病告呻吟羸
億之餘支頤獨坐猶不廢筆札臨終與故人索別其聲
琅琅潜然淚下獨以不得見其父為憾嗚呼汝器一至
於是哉夫以汝器之強學廣記修之於困窮其業亦勤

矣以文章取科第見知於時有盛名矣入官翰林職侍
從爵祿加於身知過於聖天子其榮幸為何如乃不得
大展其志而卒以天死是非命乎雖然以汝器所立者
如此視彼老死山林無一藝可稱泯然與草木同朽腐
者其得失又何如予固知汝器為不死矣壽夭何足道
哉

書張孝子傳後

溫之平陽有張氏名正字思中者事其母以孝聞鄉人

異之稱為張孝子前太史蘇公伯衡次其事為傳而其
名益顯思中之子真今為進士歷政于朝間以公所著
傳相示丐一言識其後予謂五倫有常道生人有恒性
子之事親以孝者亦分所當為豈異事哉然以唐虞之
世百姓不親五品不遜猶不免以命契以是知至孝者
之難得而能竭力於是者所以為尤難也思中為人敦
樸謹愿自幼篤於事母平居之際事無小大不稟命不
敢專行之母嘗遭惡疾不可為思中憂思勞瘁為禱於

神汲汲焉若有求而弗得至刲股和粥以愈疾而人皆
莫測其所為異時母滯下卧起出血糞思中不避穢惡
輒手除之無纖毫厭倦意其婦或懈於事母久復有間
言思中切責之不少貸遂改悔成賢婦之行母歿盡力
襄事晨夕攀號擗踊幾致隕絕聞者莫不為之感傷焉
夫天下之事同於人者不足以為異惟能為人之所不
能為者乃足以為異思中之孝殆異於人者此其所以
見稱於世也與嗟夫忠孝者天下之大閑也思中以孝

著於其家而又篤於訓子俾其發身科第自致青雲之
上方將移孝為忠以事其君以顯其親榮三釜之養拜
旌德之封則天之所以報施於思中者固未有艾也詩
曰孝子不匱永錫爾類又曰永言孝思孝思維則吾於
思中蓋深有取焉展卷三嘆遂書以歸之

書江漢臣沉籍減稅事卷後

予嘗觀本深者其植必茂源深者其流必長積德之深
者其報必厚此天理人事之可徵者也三衢江氏四五

百年來衣冠科第人物相望何蕃衍悠久如此哉是必
有本源矣江之先曰漢臣者嘗事吳越為鎮海軍節度
判官宋初吳越國除漢臣上其十三州圖籍於有司當
時賦斂無藝兩浙罹其害者已非一日漢臣以為一仍
故籍是屬於民者無已也遂沉籍於河坐是以罪免擯
棄終身後雖命王方贄更定其賦畝稅一斗而非漢臣
沉籍之功不及此嗚呼向使漢臣無所顧惜以其籍昧
昧而進其重科厚斂貽害於兩浙者寧有紀極哉然則

其惠利流於無窮者當與兩浙之人相為終始而其陰
隲之報俾其子孫顯榮光大迄于今不絕者非天道耶
因漢臣之裔孫襄府紀善秉心出示此卷三復有不勝
其感者遂撫其大都書以歸之

書古樸子傳後

右古樸子傳今少傳工部尚書兼謹身殿大學士楊公
勉仁所誤而雲南叅政陳必恭之所號也必恭世居建
之浦城為人質實不事表暴宅心坦夷不為町畦崖岸

遇事任情無所矯揉人或以古樸目之因亦以之自號
云必恭來京師既請公作傳復來求予言以識其後嗚
呼大朴既散澆偽日滋世惟機巧詭誕之是務媮薄矯
飾之相師孰有能全其所賦而不鑿於私智哉必恭以
名進士為御史中臺出寃洗滯所至民受其惠及蒞政
藩閫協贊旬宣而聲譽益著推其所存蓋為敦厚而不
為險刻為忠信而不為詐諛為儉約而不為浮華持之
以謙而不伐守之以誠而不貳恂恂惓惓表裏一致蓋

幾古樸者之為矣予知必恭有素竊喜其尚古道可以風厲世俗故舉其平昔之近樸者書以歸之

題朱晦庵先生遺墨卷後

紫陽先生以天挺不世出之資紹承孔孟周程之學闡明斯道垂教萬世弗厭弗倦至于晚年德尊道立猶以義理無窮筆削難竟慊然有不足之意其著通鑑綱目褒貶大義嚴於筆袞斧鉞而繁簡相發足為史學之規範矣至觀其手書自謂十年義例方定且欲求友就正

其得失則其不自滿足之心為何如哉雖然豈特其心不自滿足如此觀其他記張魏公事歎其不同追悔於三十年前至懇辭趙忠簡公銘誌而不肯執筆則於此尤足以見大賢君子年彌高而德彌邵道益尊而心愈下宜天下後世尊仰之於無窮也此卷手書凡三二書如前所云一書則折簡道安問者京口何彥澄寶藏之以示予於戲先生片紙隻字流傳於世不啻拱壁之難得況此晚年之筆其所言尤後學所當矜式者耶拜觀

之餘謹識歲月于後云

書衛生寶鑑後

世傳東垣李明之從易上老人張元素得醫術之妙其用藥至詳實而以固根本為重其後明之之門人惟羅謙甫得其傳謙甫嘗著衛生寶鑑以傳於世學醫之士莫不宗之誠若布帛菽粟之適於用可有而不可無者吳郡韓公復陽力學好古尤精於醫家之說間取明之與謙甫所著脾胃論衛生寶鑑諸書叅互考訂以正其

訛嘗欲鋟梓嘉惠四方竟貴志而歿今公子太醫院判
公達能繼公之志既盡取明之所著者刻而傳之復繕
寫衛生寶鑑總二十四卷次第而刻之書成來求予言
以識其後於乎公達之用心亦可謂勤矣夫積善而行
陰隲莫大於醫有若公達之存心濟物不擇所施而惠
及於人者固博矣乃又能表章二公之書刻梓流傳與
衆人共之則其惠利及於天下後世者其可涯涘哉雖
然醫非難得其傳為難觀於此者尚求謙甫之所以為

醫與公達之所以用心而思以盡其術則於是書庶其
有得焉

書慎獨齋卷

盱江張氏以儒起家自宋元迄今以文學著聲者代有
其人至彥英氏尤博雅溫純自少力學為儒先長者所
器重嘗名其藏修之齋曰慎獨其志兢兢然蓋欲致謹
於幾微未嘗以目之所不及見耳之所不及聞而須臾
忘乎戒懼誠有志於道者矣今彥英墓已宿草其揭名

予齋者尤瞭然在人耳目使仰而瞻之者莫不為之起敬而凜然以自懼是則彥英所存不惟能成諸已而又
有以淑諸人其見稱於士君子者豈偶然哉彥英子文
昭以進士第八翰林為庶吉士擢中書舍人持是卷來
求予題予嘉彥英之克有賢嗣而喜文昭能繼承先志
以不墜其世故不辭而為之書時永樂辛丑秋七月十
又六日也

書積善堂卷後

子觀天下之物皆由積而後成水之積由涓流而可以
江河土之積由寸累而可以為岡巒人之於善也今日
積之明日積之又明日而積之進進不已而其餘慶可
以及子孫觀之渤海孫氏可見矣孫之先以忠厚起家
有曰得才者樂善好施予賙窮卹匱汲汲焉力行之不
怠鄉人目之為長者得才之子成甫尤篤志於善輕利
重義居鄉里恂恂焉不為表暴教其子克讓克恭底於
成立克恭由鄉校登成均為兵部司務擢陞員外郎嘗

念其祖考積累之勤而不敢以忘也乃名其堂曰積善
國子祭酒胡公既序而詩之復來徵予言予聞之於易
曰積善之家必有餘慶書曰作善降之百祥天人感應
之理可徵不誣今孫氏之祖若父既勤勤焉啓迪之於
其先而克恭兄弟復勉勉焉繼承之於其後所謂水益
增而深山益增而高者吾知孫氏餘慶沾溉於後人以
傳之無窮蓋未可量也展卷三歎遂書以歸之

書陳智仲墓誌銘後

中書舍人陳宗淵以文淵閣大學士兼左春坊大學士
胡公光大所為其先公智仲甫墓銘一通相示且請予
一言於戲君子之所以可傳於世者以其有行義而已
當元末公以才諳見稱於時授長樂巡檢有異績陞為
防禦義兵副萬戶命且下而天下多事矣乃力引而退
蓋將託耕稼而終身焉公為人剛毅廉介事親以孝聞
處昆弟篤于友愛待宗族恩義兼盡交友朋質直而謙
下周貧郵置孜孜不倦嘗有負債而死者即焚其券終

身不問或有死不能斂者則賻以棺衾而葬焉宴居之
間動必以禮言必合典則教子弟切切焉以勤儉謹飭
為訓晚節優游築室別塢日以種花藝圃為事實客過
從者觴酌賦詠必盡其樂公之行誼表表在人耳目者
益如此於戲世之士負才藝居顯位享高爵者固為不
少而其隱約山林高蹈遠引以終其身者往往如是求
其能如公之隱顯進退卓然無愧於行誼者益鮮矣然
則公之可傳於後者獨不在此乎余嘉宗淵能承公之

志而喜公之慶澤綿綿乎尚未有艾也故書以彰之且
以為陳氏子孫他日之徵也

書南雅集後

予觀天下文章莫難于詩詩發乎情止乎禮義其辭氣
雍容而意趣深長者必太平治世之音然求之古作而
徵之於今何其寥寥也此予所以讀南雅之作而重有
感焉南雅乃三山陳仲進甫因其所作以為號也仲進
力學好古而尤工於詩所為古今體五七言各臻其妙

辭氣之間雍容不迫而悠然有深遠之趣其太平治世之音與且詩於政治之得失所關甚大仲進常為宜陽韓城二縣丞復知江山皆有善政以及於人察其音之平和則其施於政者可得而知矣仲進之子中書舍人登聞以此編相示且請予一言予閱之數日而喜其言之合乎古而有徵於今也故書以歸之

書姚伯起考滿卷後

古之所謂賢守令者以其能順民之情不生事以撓之

故政平事理著績循良至今猶班班可數而稱也予友
姚伯起氏慈祥樂易為東鹿者六七年而民甚安之安
之之道蓋亦順焉不撓之而已夫民易治也而令又與
民相親也後世無善治之吏不與民親則又反其所好
而厲之往往績用弗成以至于壞名災已者職此之由
耳予來北京幾十年守令以賢明著稱者甚不多見獨
深州得故人蕭伯辰於東鹿得吾伯起焉深與東鹿相
距密邇其人稱道二公之善者如出一口然迹其所以

為治亦無大相遠者於戲使天下之為守令者皆如二
公之賢民其有不治者哉伯起來報政將復還其邑學
士楊公率能賦者作詩為餞而屬予一言予素知伯起
故樂道其善而并及于深州且以為守令者之風勸也

書墨妙卷後

西昌劉士皆氏以四川按察僉事得代還京師乃求一
時朝士之名能書者各書古人詩詞萃為一卷而題之
曰墨妙今改調河南將行復來徵予言以識末簡夫天

下之物有可以愛玩嗜好不至於沉溺賈禍者惟翰墨
為然而昔東坡猶以為戒謂不可以留意若留意於此
則亦足以為病士皆脫灑超邁其篤好於此必能得其
樂而無所病焉政事之隙時一展而玩之想故人於天
上豈不重停雲之感而有無窮之思者乎卷中所書予
未暇有所評品然皆各臻其妙使在後日觀之此亦為
難得矣士皆尚愛重之

跋

跋定武蘭亭

蘭亭模寫多失真以致真贋難辨余平生所閱石刻者
無慮數十惟定武本尚存古意然見於世者甚少此本
以為元大德間臨安唐師善所藏而趙文敏公題識其
下文敏以為紙墨佳拓本工世所不易得者誠為確論
矣因丘敬常持此求題故書其後如此

跋周氏所藏先世遺墨卷

右手書一通元吉州路總管周公耐軒之筆也公在宋

之季以神童科顯名當時仕至吉州刺史元有天下復
兩拜總管吉之人在其時得不荼毒者公之力也故公
之大節雖不著而郡之父老至於今德之於乎公其可
謂仁人矣公博學洽聞勤於著述文章翰墨兼致其美
此書公五世孫秉昂所藏秉昂之子忱今復以進士為
秋官屬故家文獻蓋有足徵者矣秉昂來京師間以求
予言念前輩之既遠想流風於異代不覺為之慨然於
是書以歸之以俟知公者尚有徵焉

友蘭軒跋

古之人取於友也尚矣夫子曰以文會友以友輔仁孟子曰友也者友其德也又曰一鄉之善士斯友一鄉之善士一國之善士斯友一國之善士天下之善士斯友天下之善士以友天下之善士為未足又尚論古之人然則君子學以明道以成其德者其可無友乎塗之王笥有士人羅孟載篤志於學其取友也不出于鄉于國于天下而乃在于家庭之間其友非父子兄弟而獨有

慕於蘭者何哉豈非以蘭比德君子固尚之與抑以蘭
居深谷處幽獨而不競可以養德與抑以其清操雅韻
高潔不污而可以礪操與孟載于是數者必深得之矣
夫豈友之云乎蓋不日而與之俱化矣俟余他日謁告
南歸艤舟玉峽之濱尚當造孟載軒中相與賦詩酌酒
鼓猗蘭之曲和澧浦之歌為三友之會不知可乎否也
姑書此以俟

跋黃氏教儀後

予友東萊黃公福始以經術發身事我太祖高皇帝為
衛幕陞貳工部煜然有聲逮太宗皇帝入正大統遂擢
公北京行部尚書未幾命往鎮南交公鞠躬盡瘁勤勞
夙夜撫輯綏徠無一毫弗盡者由是交人德公如父母
而勲烈聞望遂著于天下當仁皇嗣統以公久勞于外
特遣人驛召還京改工部尚書且命兼長官寮比年朝
廷以交人反側復命公往鎮撫之將行命其子琮讀書
于南京郡庠因疏為教儀以訓之琮服膺弗敢忘復以

公手筆裝潢為卷持以請予識其下方公之為教總七百餘言其目有七首之為學修己治家之道次之以待人接物之方又次之以服用食飲之節其言切實而簡當鑿鑿乎若布帛粟菽不可一日而無者於乎公可謂善教其子矣雖古義方之訓復何以加焉琮尚勉之惟日孜孜因其言以究其理因其事以力於行密察於幽微致謹於操持内外交修終始一致庶幾賢人君子之域可企而及矣琮尚勉之予日望子尚有以復我哉

世美堂跋

余嘗觀古豪傑士乘時奮興以其智力佐主定天下靖禍亂小者身致爵祿之富大者勲名彝鼎之重莫不欲傳之子孫俾世守之不替然或身歿之餘或易世之後已陵夷不振至於門祚傾覆者有之此余於合肥王氏不能不為之嘉歎焉王氏之先有曰玉與其弟瑛俱以忠勇事我太祖高皇帝戮力效謀東征西討屢建奇勲豐爵厚祿榮於其躬天章寵錫光耀閭閻英武奮揚卓

冠當時真可謂傑特不常者矣而瑛之後則有若迪以承之迪之後則有若謙以繼之六七十年之間王氏之祖孫父子兄弟襲圭累組繩繩相繼如源泉之注愈遠而不竭亦何其盛哉今謙移鎮于溫練達武事能舉於其職則所謂世濟其美者於斯堂有光矣嗚呼為王氏後之人尚益體先世之勤勞兢兢業業恒以失墜為戒而思保守之不易則其流慶所及尚可涯涘哉因謙徵言遂書以歸之

跋吳氏家乘後

右吳氏家乘一編元處士伯純甫之所集其裔湖廣參政某之所重錄也吳氏以族望於南昌曰北山自其鼻祖太師儀國公居厚以相業顯於宋歷元迄今詩書德業之傳衣冠文物之懿數百年來愈遠而愈盛江右故家大族若吳氏者蓋不多見也今觀是集所載首於褒賢閣記則儀國為武康節度時之所作也其次繼之以序銘誌等作則皆有宋諸名公或為述其奕世名堂之

義或載其先代德業之實舊家文獻粲然可徵於戲盛
矣伯純甫集錄時鄉先達胡寔桂先生嘗序以錄諸梓
以永其傳不幸中遭兵燹漫滅散軼某懼其久而不足
徵遂託其鄉友中書舍人王仲叙重錄之以藏于家其
用心之勤可知矣夫莫為於前雖美弗彰莫繼于後雖
盛莫傳吳氏之先儀國尚矣其承藉於後者固未始乏
人今某以經術致身屢參藩閫綽著聲稱所以紹儀國
之烈以為吳氏之尤者安知不在今日乎吾見是集益

將續書而不替矣某之後人尚其世世寶藏而篤念之
哉

跋蕭氏族譜後

君子之所以重其譜者蓋所以敬其先而重其所出也
族之有譜雖衰世之事而亦少寓宗法之意故後世賴
之廬陵之曲山蕭氏其先為湖南人五代時有文昌者
避馬氏之亂始來居廬陵今翰林修撰時中距文昌十
有三世蓋已五百年于此矣譜有乾派有坤派者蓋本

於文昌之五世孫廷珣廷珣兄弟各以其子孫系于二
大派之後今時中出於乾派則為廷珣之裔也廷珣之
子麟為仁化令者嘗修緝家譜其後亡軼十不存八九
至時中之考樂存先生乃掇其遺亡補其缺略於是世
次之先後族屬之疎戚子孫之傳叙始粲然備見於其
間而所謂舊譜者至是復完而無恙矣時中間以示予
而復求一言以識之予故推本其先與其祖考致重斯
譜之意以告其後之人俾於是有所敬其先而重其所

出而不至於輕忽廢墜則其詩書福澤之美子孫科目之盛將由是而益光顯矣詩曰毋念爾祖聿修厥德吾於蕭氏尚深有望焉

跋勤禮堂卷後

為政不可以無禮禮以定民志而一風俗也孔子曰齊之以禮又曰上好禮則民易使禮散在於事物之間而行之則在於人君子行禮以導民非本於勤未見其效之有成也余友蕭君雲高為安吉令在職三載孜孜不

怠示民以禮而秩然有其序上下之間無鬪爭凌暴之風非勤於禮者其能若是哉蕭君尚勗之他日以良吏書於史冊必以安吉為首稱余當執筆以俟

表

百官賀冊立皇太子表

伏以天命維新隆萬年之寶運皇儲肇建光列聖之宏謨中外交歡臣民均戴恭惟皇帝陛下天地之大日月之明文武聖神同符於堯舜剛健中正敬承於祖宗廣

德教於華夷霈鴻恩於遠邇明彰至理茂啟鴻圖隆太
平於邦家建元良於儲副盛禮渙頒於寶命前星炳耀
於青宮上允協於天心下永符於人望所以承宗社神
靈之統所以係海宇臣民之心弘福慶於國家衍太平
於萬世臣某等欣逢盛事喜切中心外順內安仰皇明
之如日河清海晏祝聖壽以齊天

百官賀皇太子箋

伏以寶運隆興衍皇圖于萬世重明麗正表儲位於東

朝遠邇騰歡神人交慶敬惟皇太子殿下天日之表龍
鳳之姿躬膺冊命之榮昭受元良之寄宗社所重永屬
於繼承華夷之心咸深於歡戴臣某等幸茲遭遇實切
抃欣日月光華仰前星之炳耀乾坤清泰祝睿算以隆
長

命婦賀皇后箋

伏以天佑大明茂隆寶祚皇儲正位永固邦家敬惟

闕

端一誠莊慈仁寬裕柔順協坤儀之美肅雍著

內政之成斯以闢睢之和茂彰麟趾之瑞儲宮肇建得
四海之歡心宗社隆安重萬年之邦本妾某氏等均切
欣愉謹伸慶賀祝皇圖於永世祈睿算以千秋

賀嘉禾表

伏以帝德承天盛世肇開於景運至仁育物萬方表瑞
於豐年喜溢神人歡騰中外恭惟皇帝陛下道隆堯舜
聖協禹湯廣大如天包六合而無外博厚配地普萬國
以比春感和氣之冲融致休禎之屢應維茲東甸地接

神京慶令節於三秋來嘉禾於九日金莖濯露耀光采
於彤庭玉穗搖風布馥芬於紫殿匪以備柒盛之薦實
乃見仁卉之蕃共瞻同穎之奇快觀盈車之秀斯聖神
之感格致寰宇之豐穰生民咸樂於生成天下同臻于
熙皞臣某等躬逢上瑞誠切抃歡日月照臨贊皇圖於
一統乾坤悠久祝聖壽於萬年

賀早冠表

伏以帝德廣運萬方咸囿於仁恩聖武駿揚羣醜莫逃

於天憲斯以成功之速皆原睿算之神中外均歡神人
交慶恭惟皇帝陛下聖神文武睿知聰明道合唐虞德
業經緯乎天地治隆湯武事功卓冠於古今凡居覆載
之間悉在照臨之下惟茲不靖屢擾邊氓肆動天威肅
馳虎旅將士用命奮發於雷霆宵小潛形莫逃於斧鉞
戮兇渠而不釋執醜類以咸來訊馘獲俘男女耄倪之
載路連雲擁霧馬牛輜重之入關灤河萬里以長清沙
漠一塵之不作茲皆本於宸算用永靖於邊隅隆宗社

之尊安衍治平之福慶臣某等恭逢盛事喜切中心海晏河清仰神功於永世天長地久頌聖壽於萬年

謝追封三代表為安遠柳升作

伏以皇明啟運溥惠澤於羣生帝命誕敷錫褒封於三世蒙恩深厚感戴奚勝恭惟皇帝陛下睿智聰明聖神文武功高列代化被萬方一德格天體無為而致治重華協帝建有極以錫民是以致天下於泰山之安而措宗社於磐石之固也伏念臣升才所質猥陋智識凡庸昔

備戎行薄殫勤力幸除風雲之會忝膺封爵之榮卹典
載加尚不忘於先世恩光下逮復顯被於幽明若斯異
數之頒實出非常之賜春生泉壤喜溢門庭弘深天地
之仁永遠子孫之寶臣升敢不懋勤夙夜罄竭鄙愚俯
攄葵藿之誠少效涓埃之報望天顏於咫尺莫展寸忱
頌聖壽於萬年敬伸三祝

追封謝表為應城伯孫享作

伏以聖德弘深卹典特隆於今日寶章焜耀推恩復逮

於先臣喜溢幽明豈勝感戴恭惟皇帝陛下道高堯舜
功冠禹湯斂福錫民被八表而無外法天圖治協萬國
以咸寧同臻熙皞之仁均被生成之賜伏念臣父巖昔
侍藩邸幸備使令繼靖奸兇獲殫微力論功行賞金書
特荷於褒封竭慮摠誠白首尚懷於報稱詎意溘先於
朝露載蒙申錫於榮恩顧茲異數之頒實出非常之命
永遠子孫之至寶恢弘闕闕之輝光臣敢不勉効勞勤
繼承先志益圖補報上答君親日月九重瞻天顏於咫尺

尺乾坤一統祝聖壽於萬年

銘

聚奎堂銘

有序

少傅工部尚書兼謹身殿大學士建安楊公嘗得隙地
於長安東門之南構屋為朝退宴休之所方落成適當
取士之期故事第一甲三人例授官翰林既就職同官
必相與設宴以致慶時翰林公署未成學士江陵楊公
請於公之居成禮焉於是羣公畢聚冠衣儼飭進退有

容宴飲甚歡少傅廬陵楊公遂名其堂曰聚奎蓋謂奎
主文章以貺今日文儒之盛其兆若前代五緯之聚奎
然惟昔太丘長陳仲弓嘗謁高陽荀季和二家子孫皆
賢德時太史奏德星見以為五百里內有賢人聚當今
文明盛時諸君子皆才德之賢相與會聚又咫尺宮垣
之近安知今之職星象者不有所見哉名之曰聚奎宜
矣一時士大夫咸歌詠之間示余屬識一言因序而銘
之曰 維昔五緯聚奎符禎其禎伊何天下文明粵有

顯象名曰德星賢人所聚其瑞斯呈在昔既然今豈無
徵翼翼高堂近接帝城君子有位持國之衡君子宴休
思政所營國家閒暇海宇入寧賢才奮庸接武登瀛乃
啟宴樂乃集時英尊俎在列朋酒斯馨冠衣有偉秩秩
儀刑醉不失度樂而合貞匪樂之慕惟禮之成維此君
子濟濟在廷匡時致治際此嘉亨象由天顯肇自人興
惟我皇明聖聖相承春涵人煦和氣薰蒸人賢維茂象
緯斯澄觀占有式仰察惟精定應垂象昭此昇平豈俾

前古獨擅厥名斯堂之光羣公之榮我作銘詩永揚嘉聲

時敏齋銘

有序

六經之言學肇自武丁之命說而惟學之道曰遜曰時敏而已遜則虛以受人而如有所不能敏則勤以勵已而如有所不及大抵天下之善無窮君子之學無已春秋代序老冉冉其將至不遜志時敏學其有成哉友人郭君鼎貞自少有志於學虛已下人有惟恐不及意嘗

以時敏名齋蓋以自警也今歷仕秋官而夙夜拳拳猶
不忘乎學誠可謂無時而不敏者矣君來徵銘有不可
辭乃為之銘曰 惟皇降衷均厥賦予曰義曰仁德莫
不具惟德如何有積乃大君子于學思罔或懈詩書六
藝藝在方冊窮覽貫通時敏之力念茲在茲勿玩勿愒
無或半途斯道可至譬乃鑿井深則及泉亦猶播種勤
則有年嗟嗟學子矜世銜名鹵莽滅裂詎底其成一暴
十寒既作復輟茫如望洋瞠若先哲卓我郭君銳志莫

過慕古為學期於上達學優既仕篤志力行恪勤于職業業兢兢早作夜思赫其若臨涵養操存祇栗一心齋居有嚴日新又新我其銘之尚最後人

樂善堂銘

有序

平江伯陳公瑄嘗以樂善願其堂間屬予繹其義而為之銘予惟善者德之純美無雜原於天而具於人人皆有之也然人之於善能慕之者鮮能好之者尤鮮也至於樂之而不倦者非其言與行一心與理融而為誠身

有道之君子者不能然也公今為國柱石勲庸著於旂
常聲望重于海內而其平居樂善孳孳焉有惟日不足
之心是真所謂古之君子而誠身有道者矣予故樂道
之而為之銘曰 惟人之生萬善咸備至純不雜至精
而粹其善伊何曰義與仁曰禮與智本乎天真大而綱
常微而動息當理不偏皆善之德衆人慕之亦鮮克好
君子樂之深造夫道猗與平江為國重臣勲業之茂德
行之醇含英咀華由中達外以善為樂心廣體胖其樂

何以日用從容言與行一心泊理融非仁不為非義不履左之右之折旋規矩斯實可樂厥身乃誠德崇業廣益鴻厥聲吾聞積善必承天祐匪惟身榮實昌厥後猗與平江享有崇封孫子多賢壽考彌隆高堂奕奕君子之宅咨爾後人永世無斁

默齋銘

凡人有言恒吐于口樞機之發榮辱所召維言如泉維口如隄涓流弗謹為河為溪是以君子不易于言守口

如瓶懼致尤愆匪惡於言而尚以默發必當理以寡為
德我觀佞夫利口謀謀招怨賈禍曾不自惜君子存誠
克念克敬謹言慎行表裏交正有翼其齋聖賢是則監
此銘詩其永無斁

陳思孝硯銘

其質澤而溫其體重以確逾端溪之子石超鄴下之銅
爵涵清泉於靈竇起玄雲於斷齧集毫端之芳潤散妙
蹟於製作斯所以常侍乎君子而為至寶之太璞也

明其明銘

人之有心具夫衆理虛靈洞徹如鑑止水是曰明德乃
得於天四端既具萬善備焉人惟有欲耳目口鼻外物
誘之為欲所蔽本體既昧明德斯昏涵養克治其明乃
存惟目亦然明以能察高視八寰微見一髮亦既病矣
若或翳之匪伊視遠為眊為眊百病所攻甚者在目弗
有善醫明曷能復猗與陳氏術業專門二世攻目慶澤
攸存爰築居室揭額明明金鉗電掃以啟羣盲嗟彼世

人心盲目瞽內外交蔽冥行弗顧陳君明明盡治其內
內寧外安良醫之最我作銘詩以懋厥德勗爾來裔鑒
茲靡忒

贊

職方周先生畫象贊

君以弱齡挺特自異讀書學古奮然有志栖遲林泉泊
乎布素弗競弗趣履坦居易中邁休運始出而仕首教
桐城作興士類繼佐即墨政是用理入教國子揚于道

義擢輔親藩正言不諱益堅其守益昌其氣知遇聖明
弗為擯棄既出復入遂為博士過以廷薦躋于顯位用
副職方以贊于治白首不渝志操彌礪冠衣有容屹若
山峙匪容之充惟德之似尚期老成臻于百歲後千萬
年詒于孫子

張宇清真人畫象贊

葆冲毓和如春之融與道為徒玄教之宗下上太清浮
游崑崙憑虛馭氣惟以永存

胡敬方先生畫像贊

問學該洽有本有源也操履純正弗頗弗偏也浩然有
為以古人為徒也儼乎可敬斯君子之儒也

陳叅政子魯畫像贊

績學鄉郡而發身乎科第列官詞林而親承于帝制懷
謹畏以自持躬儉約而不肆適遭遇於聖明遂超躋于
秩位爰周歷于遐邇重敷宣於德意恒夙夜以兢兢戒
淵冰于顛墜浩乎而氣益充毅焉而操愈厲於乎此所

以永保終譽而克享富貴者也

蔣侍郎驥小像贊

貌溫而氣和行篤而志確以文學而叅侍從以編摩而居館閣周游兩京之間歷事三朝之際方躋學士之榮邁陟秩宗之貳謂宜享壽祿之遐胡遽有死生之隔覩遺像之儼然發永慨於今昔

陳中書登畫像贊

儼乎其容癯然其狀以文藝而馳聲以翰墨而自放識

彌廣而粹愈雄志彌堅而氣益壯知之者以為博古之
老成而仰之者咸稱為中秘之哲匠於乎此其所以優
游夫石渠天祿之間而翱翔乎鑾坡鳳池之上也

劉僉憲咸畫像贊

氣和而克識周而通發身科第歷躋顯融勇冠在首華
珮在躬凜乎風采君子之容

蕭深州畫像贊

發身本乎儒雅歷官至於老成觀其容儀則粹然圭璧

之溫潤觀其持守則毅然松栢之堅貞規畫有條而政自理撫字有方而民以寧追潁川之遐躅揚渤海之芳聲於乎此其所以為豈弟之君子而遭遇乎太平者也

陳太守希顏畫像贊

猗與涇州本乎世德溫溫其儀侃侃其色蜚聲橋門發身經術首佐邦刑廉公正直敷歷數郡稱於其職不猛而威匪緩而亟惟寬惟平以著厥績惟忠惟勤以報于國豈弟君子壽考之錫猗與涇州其永無斁

林推官同畫像贊

才可以適時學可以淑身廉可以養德惠可以及民斯所以克任夫官政而無忝於搢紳予雖未窺其際而知其有守有為為君子之人也

傅玉良畫像贊

氣充而粹性介而方弟兄師友才學之良爰發身于科目遂受任以長民處煩劇而弗激弗撓盡撫字而益厲益勤偉矣衣冠之美儼乎豈弟之風尚曰彌堅於志操

庶茲茂陟于顯融

羅以德畫像贊

其外之坦坦其中之舒舒究義畫之微旨誦老氏之遺
書適起辭於雲壑遂歷覽于金門是將優游於太平作
江湖之散人而為市朝之隱淪也

彭敷哲畫像贊

粹焉資質之美浩乎辭氣之充篤信聖賢之要力求經
術之通涵養獨嚴於省察操持克秉於謙冲藹藹菁莪

之化優優麗澤之功豈曰範模於一郡寔將致位于顯
融斯所以行成於己道行於人而垂令名於無窮者也
袁貳尹景陽畫像贊

水涵其潔玉粹其容學優而仕才敏而通豈弟之政循
良之風壽雖弗厚而獲令終位雖弗滿而德則豐允矣
君子垂裕無窮

壽星贊

居狼之北舒陽之榮秋中方旦于丙揚明既應壽昌亦

昭治平孰測天象而圖厥形噫此所謂南極老人而符
盛世之徵也與

余弟幼學以永樂壬寅秋九月自西江來省予北
京永嘉謝庭循為作行樂圖小像其歸也余為之
贊其詞曰

浩浩乎氣凌于宇宙飄飄乎志在於江湖閱歷飽諳於
世故辛勤幸守於儒書惟事親敬兄益敦於孝友而待
人接物何有於廉隅政此優游於畎畝故將終老於衡

廬撫雲松而嘯傲諧觴詠以自娛坦坦焉舒舒焉其所
以無榮無辱無毀無譽介眉壽于耒艾與六逸而為徒
者也

袁處士景哲畫像贊

蘭玉之操冰雪之姿孝友之行君子之儀優游太平讀
書誦詩後千百歲子孫之思

袁士建畫像贊

蒼然不變者松柏之貞湛然不汙者冰玉之清作士林

之翹楚紹文獻之家聲晚際風雲之會幸霑一命之榮
惟歎焉而不足乃自任而弗輕匪曰力行於豈弟寔以
圖報於聖明於乎此所以行期於古用適于今而為練
達之老成者也

楊德誠小像贊

刑部侍郎勉之父

神完氣充以養其貞幅巾逍遙以遺其名曰壽而康以
篤其慶子孫之蕃以樂太平

丘處士時用畫像贊

其容之溫溫其言之恂恂居鄉而忠信是與居家而禮義是敦招風月以為友約詩書以為鄰邈乎猷猷之志悠然湖海之情此其人所以養之厚居之安而能樂乎考槃者也

陳俊文畫像贊

為欽天監挈壺正

寬和而不迫謹慎而不矜探賾象占得義文之奧究察地理識陰陽之情早受知於明聖寔見重於公卿名列五官之秩恩沾一命之榮斯所以朝衣朝冠日近天顏

而出入乎大廷者也

黃子範畫像贊

抱敦實之學負耿介之資不翕翕以附衆不汲汲以趨時其行已則素高於道義其居官則無間於終初求其人似有黃叔度之風視其貌蓋亦崔斯立之徒於乎清江碧嶂之間蒼松白雲之外尚俟予懸車而來相與詠歌太平以為香山之會者也

太醫院判蔣用文畫像贊

盎然而溫者春陽之舒介然而清者冰雪之敷養之深而氣益充行之篤而守有為匪曰究通乎經術之懿實亦兼盡乎醫師之良斯所以遭遇於明時而瞻乎日月之光顧老而彌篤者服勤報國之心至久而弗衰者濟時澤物之志於乎此其為忠厚之士而無愧於君子也

蕭欽讓畫像贊

褐衣角巾瀟洒出塵蘊謙和之美履孝友之純磊落田園之趣逍遙風月之情惟是閒散之可樂曾何榮辱之

足驚宜其壽考康寧無憂無慮而享福於太平者也

贛之寶臺觀道士丹霞子畫像贊

盎乎其氣粹乎其容練真保融探蹟玄宗玉珮雲裾振揚天風上朝紫宸遐觀鴻濛與道為徒何始何終

僧錄司右覺義雲山畫像贊

至哉佛氏稱大雄甚深微妙具圓通法身變化不思議十方充滿妙難窮雲山學佛出南詔當年被召謁九重禪林修習得清淨精持戒行勤初終菩提妙義時演說

慈雲下布蓮臺中伊誰著此丹青筆為貌滿月開真容
輝光一時徧寶刹人人讚歎生敬恭我聞佛身出萬劫
不生不滅了無蹤恒以太虛為體相視此妙法皆虛空
雲山究竟無係著須離諸幻超夢夢慈悲利濟悉平等
成就願力揚宗風永贊皇圖隆佛道四方八表登時雍
董長史畫像贊

學足以明理廉足以守身謙乎其不伐介焉而不羣出
則長民於百里入則領教於成均揚休嘉於藩邸挺風

裁於搢紳繫豈弟之君子庶無愧於古人

趙長史畫像贊

肅容正冠儼乎有思也篤學力行浩然有為也廟堂之器松柏之資也永保終譽壽考為期也

彭子斐畫像贊

世承文獻之懿家傳專門之學得褒貶於師承究微言於先覺浩然而氣愈充欲焉而志彌約接論議於搢紳與讐校於館閣是將鳴太平之盛為道德之光而作髦

士之矩矱也

于中書子楫畫像贊

脩然林壑之清烟乎冰玉之潔託闔闔以自高處布衣而弗折際熙運於昕朝沐榮恩於晚節偉命服之雍容兼綵侍以娛悅適几杖於燕休寄嘯歌於風月綏福履之未央享眉壽於大耋

郭郎中鼎貞畫像贊

衣冠之族汾陽之胄振家聲于兩郡之間承世澤於千

卷十
年之後爰發身於科目遂擢任於郎官平恕每存于心
曲聲華素滿於朝端顯融幸際於清時補報敢忘於白
首庶幾眉壽以為期尚播休光于永久

贈翰林編修曹處士畫像贊

編修義之父也

養以澹泊居以坦夷春風秋月衍樂以熙優游太平壽
考邁躋爰用子貴畀以清秩命服之華儀容有飭子孫
其承永世無斁

張和卿畫像贊

陝人今冬官正明之父也

在昔壽州牧守維良
配顏鶴髮煜其有光
皇用追錫寵
以天章善既弗替慶
則未央猗與壽州其
永弗亡

郭處士檜林畫像贊

汾陽之系忠武之胄
詩禮之傳衣冠之舊
惟善是承惟德是懋
尚永無替以貽厥後

龔仲墳畫像贊

養乎內澹然而自足
接於外溫然而可掬
雖托迹于公卿亦忘
情乎榮辱綠鬢朱顏
角巾時服步天上之
春風

散杏林之朝旭匪余識其平生伊誰知其幽獨於戲此
所以為吾仲墳而有此康寧之福

字說

郭用檜林字說

鄉先輩孔公貫道嘗名其郭氏之甥曰用而字之曰檜
林且曰檜非常木吾夫子嘗植之闕里至于今子孫族
人護視之益謹而不敢怠四方過者必拜而後敢仰觀
焉檜之見重於聖人見重於後世若此則字豈可輕哉

於戲先生之期待於甥者何其切至若是也先生歿已
久其甥既長恒為余道其舅氏所以命名與字之意且
屢請為之說余不獲辭則進而告之曰檜貞木也其質
勁其性確其內栗而文其根盤而深其幹端而直其枝
葉翦密陰翳滋潤上可以蔽天日歲寒霜雪凌厲挺立
霄漢氣色芒寒而略不為之變及取其材而試之則足
以任重負厚柱明堂棟大厦屹立宇宙以為四方之仰
瞻則檜之用豈不大矣哉人之為人鍾和萃秀直方雅

厚以端其性敦柔溫裕以養其心輔之以仁義忠信載之以詩書禮樂剛正弘毅內之而無所歉外之而無所怵一旦推而達之於天下國家則足以尊主而庇民濟人而澤物建功立事顯融當時以垂聲光於久遠者其用亦弘矣檜林尚顧名思義兢兢焉閔閔焉生息涵養以充于其內培封扶植以立于其外將見繁殖滋榮摩霄戛雲鬱然成材材不可勝用矣昔檜林之先人德存甫溫雅篤厚好施予以醫藥濟人與先少保尚書雪厓

先生交莫逆其時貫道公尚無恙先少保與公往來尤
極雅善四十年之間前輩風流若逝波不可復見矣獨
檜林猶能稱道其一二以益余之所不及此為可嘉者
檜林勉勉尚求之無負于舅氏之命以為斯文之光則
他日所至又未可量也

傳

蔣侍郎傳

公諱驥字良夫姓蔣氏錢塘人也祖秀實以隱德終父

均美以公貴封左春坊司直郎母姚氏封安人公少好學攻文辭弱冠以春秋經試荆江鄉闈居前列遂第進士擢行人能其官永樂初太宗皇帝詔文學之臣纂修高廟實錄公與焉書成陞翰林檢討賜白金文綺襲衣已又與修永樂大典為副總裁賜楮幣綺帛前翰林學士解公出為交趾叅議以事逮獄公坐累拘幽者十餘年中局坦然日以書史自娛未始有幾微怨懟仁宗皇帝即位宥復前官逾月陞左春坊司直司郎今上皇帝

嗣統之初以宮僚恩遷翰林侍講宣德紀元奉命祀東
鎮洎大禹南宋諸帝陵竣事遂得便道省謁其親公家
錢塘二親高年在堂且膺封秩公復使命歸本郡方岳
重臣以及郡邑官僚咸瞻望下風公歡然不敢當日戲
綵承顏以壽其親椎牛醢酒以宴集其姻鄙鄉人榮之
歸朝與修兩朝實錄書成賚賜循永樂故事復進秩侍
講學士無何上命左春坊大臣簡廷臣之才且良者佐
六卿公膺選授禮部右侍郎衆慶得人蒞職逾二旬得

夙疾不移時遂卒上聞為之悼歎遣使賜祭且給舟歸其喪命有司為治祠墳恩典之加可謂厚矣於乎公天性孝友嘗迎司直公就養京師朝夕起居侍奉備至獨母安人道遠弗克就居嘗悵悵以前此奉祀勿遽不盡膝下歡屢欲歸省值編摩事劇不果言及輒歛歔慨嘆兄弟二人公居長與其弟友愛無間言公素善筆札嘗奉命書列女傳特被褒賞禮部會試兩為同考官時推其公為人美丰儀善談論尤喜賓客所居軒楹清曠几

席整潔佳花異卉雜植前後客至詠歌觴酌歡如也其
雅懷洒落蓋如此予每私竊自念同年數人在朝多顯
仕公獨居散秩洎遷學士深以為慶拜侍郎益為之慶
蓋冀其有為以遂其平生所志也奈何天不慙遺遽焉
殞逝聞者莫不痛之公享年五十有三所為詩文總六
卷前後所錄公多手筆云贊曰士之負才器問學固
將有為於世也其或仕與時違不能奮揚其蘊蓄蓋有
命焉耳一旦遭逢可以有為矣而天不假年志與願乖

豈非命耶若蔣公久居散秩中值坎坷仕將終身逮逾中歲躋于顯融足以自見而奄焉捐世信夫命之不可以強也雖然公平生所致磊磊若此亦可謂傑特之士矣夫復何憾哉

袁義士傳

袁大珍字仲仁其先鄞人也自其曾祖以禮來官金華遂為金華人仲仁生元之季遭亂而廢學其父嘗告之曰汝無以弗學為歎古人往往有不知書而所行自不

悖于道者汝第能篤于信義使鄉閭稱為善人斯可矣
仲仁謹識之不忘遂刻意樹立營植生產孝事二親朝
夕惟謹父歿哀毀幾弗勝母董氏患未疾日扶持在側
未嘗頃刻違去至躬親矢漉前後凡五載如一日從兄
大通客死東甌仲仁匍匐往收其遺骸以歸嫂張氏吳
氏孀居無子仲仁養之終身二姊適寧氏與皇甫氏皆
寡為迎歸于家畢其男女婚嫁割田園贍之度能自給
乃已撫其孤甥姜某為之擇配養其外姑楊氏幾四十

年而終友人張彥希仕為雲南幕官致政于家一夕夫婦為仇家所殺惟一女甫生仲仁往哭彥希甚哀為持其女歸養之如己子且為迹其盜禽之皆置于法鄆人蘇某至金華遇疾同行者委之而去仲仁遣人舁至家求醫藥甚切疾愈其人弗忍去者久之郡人死無葬地多焚燒棄其骨江流中仲仁乃捐其貲鄆田若干畝俾葬之人呼為義塚又嘗用己貲為石梁造二舟以濟行者人感德之鄉黨皆稱為義士云贊曰古之人雖一

才之美一行之懿莫不著之史傳以至百世之下猶使人仰而望之得以感發而興起矧仲仁平生善行之昭著於時非一而足其傳於後世復何疑哉故為之傳以俟時之觀民風者有所採焉

王母洪孺人傳

王母姓洪氏字宗南台之寧海人唐開元間有為諫議大夫諱某者其始祖也代有衣纓為鄉鉅族祖某父某洪既筭適奉化王宗禮王故著姓與洪閥閱相望宗禮

父元帥府萬戶伯英伯英父連山鄉官希伯希伯父兩
湖運榦子震而距唐銀青光祿大夫檢校太子太傅敬
玘寔宗禮十三世祖云洪歸王氏生四男子文琳文範
文璣文璿時王氏之族人被鄉人誣告逮赴京宗禮為
白之皆得免及還道感疾劇甚臨終謂洪曰死生命也
吾無所顧惜所念者二親垂老諸孤稚弱未有所託耳
君能成吾志乎洪泣曰夫在且猶敬事撫育不敢怠矧
夫亡乎有不一心王氏者有如日遂斷髮為誓宗禮卒

洪年甫三十居喪哀戚甚終身不事膏沐躬親饋食養其舅姑舅姑歿盡禮喪葬且日夕攻絲枲資遣諸子就外傳受業時今戶部尚書兼謹身殿大學士延平陳公伯高典教奉化洪謂其仲子文葩曰吾聞陳先生賢而善教汝家世以官業著聞汝父嘗以早卒不獲繼先緒為憾汝盍往就學以成父志文葩遂負篋入縣庠從陳公游學成今為國子生方嚮用于時洪性嚴正而好施與王氏族聚蕃大洪於諸母行最尊羣子弟有不循先

世遺訓者人見輒諄諄訓諭有不悛者歲節會拜必公
言於衆愧之否則令諸子姪白於族長黜辱之必改而
後已鄉鄰宗姻死喪患難不能濟者即捐貲助之且語
諸子曰此為汝輩植德計勿吝也年登七十有七尚康
強無恙鄉閭閨閭之稱女範者悉歸之見孫曾四世云
太史氏曰女婦之德見於載記尚矣守貞節者孝慈或
鮮聞況能以教淑其子及其宗族乎若王母洪氏者其
兼而有之若此豈非女婦而士行者耶則享有壽考宜

矣其子方將佩服懿教力學以顯名於時吾見其與古
之稱於載記者不幾矣哉

哀辭

贈奉直大夫左春坊左諭德楊公哀辭

有序

泰和楊公子將其先蓋出漢太尉震之裔轉徙錢唐歷
廬陵吉水始家于此祖景行元進士官至翰林待制有
盛名公自少穎敏過人讀書力學總角已有聲藉藉其
為文操筆立就迥出時輩儒先長者皆器重之平居孝

於親友於昆弟忠信篤厚出自天性閱歷險夷終始一
致拯顛濟危汲汲然惟恐不及而不幸享年不永卒之
歲纔三十有四一時賢士大夫莫不哀悼之予生晚弗
及瞻望公之風采幸與公子士奇同官禁林出入侍從
幾二十年公以予貴荷蒙恩眷贈職官僚寵光下臨貴
及幽壤公之所以得於天而敷遺於其後者可謂盛矣
公潛德懿行以具載墓碑予不能無言獨哀之以辭且
以慰吾士奇罔極之恩而昭示於無窮也辭曰 繫關

西之苗裔兮瞻閥閱之孔華抑太尉之盛德兮矢清白
以傳家美華陰之遙遙兮卜錢唐而轉徙再遷於廬陵
兮耀官牒之有煒繇文江與西昌兮滴慶澤之彌深騁
逸軌於文場兮待制處乎詞林睠夫子之克承兮偉妙
齡之英秀方髫髻而知學兮披奧義而研究惟天性之
孝友兮敦行誼於彝親探聖賢之遺言兮廼克踐于其
身年甫冠而馳聲兮抱韋編以就試拔餘思於倉卒兮
尚足策乎高第播鳳雛之美譽兮忽振舉而遠揚蟠錦

繡于胸臆兮搗五采而成章
脩元季之驛騷兮聚羣盜
而蜂午既焚劫于州閭兮
肆蒼黃而莫措痛叔父之罹
害兮竟殞命於異區還撫棺
以號痛兮寧暇卹于吾軀
因脫生於虎口兮遂竄伏于
山間擷澗芳以為養兮怡
菽水之歡顏奄二親之傾逝
兮勉致力於襄事妥窀穸
以安厝兮惟斂葬之兼備際
寰宇之廓清兮揭日月於
中天言將返乎故業兮復先
世之清羶何天道之難堪
兮遽嬰疾而弗起慨山木其
頽壞兮慘悲風之滿耳謂

壽夭之不齊兮諒資稟之既豐胡天俾其才兮而竟喪
其逢念厥躬之韜晦兮實流慶于胤嗣藹令望于士林
兮職清華而嚴邃膺紫誥以寵贈兮煥雲漢之天章豈
曰耀榮于今日兮雖百世而有光嗟予生之獨晚兮仰
夫子之遐躅慕高風之寥廓兮空徬徨以于鬱盤古之
崔嵬兮閱音容于夜臺聊寓情于一些兮志予心之永
哀

黃孟鉉哀辭

吉水黃公孟鉉以穎銳之資淵懿之學識趣超詣才思
逸發其立心期至於古聖賢之道為文章若泉湧川匯
浩乎其不窮沛然而莫禦每有所著人爭傳誦之以為
楷式洪武中用薦為鎮江幕屬治效尤著尋以事免官
家居益致力於聖賢之學四方從游者森若束筍公循
循善誘多所造就得其學者往往皆當時名士公為人
孝友純篤志趣卓越虛已下人不事表襮襟度洒落賈
出物表言動之間恂恂謹飭樂易和平見者心醉予嘗

辱交於公獲承公之緒論以為可久相處者曾未幾時
而公遽捐館舍矣感今思昔為之慨然爰申之以辭少
據予哀且以慰公於地下也其辭曰 維公之特兮資
性天成仁山之秀兮文水之英藻思俊發兮始於幼齡
聰穎絕人也適馳厥聲涵泳百家兮沉潛六經遠企聖
域兮玩心高明虛以受人也弗矜弗盈淬磨砥礪兮研
思覃精蓄之既博兮蘊之益弘發而為文兮五采縱橫
咸韶並奏兮金石鏘鳴江海下流兮波瀾泓渟武庫洞

開兮衆寶晶瑩瑤穹澄朗兮萬象森呈時既弗遺兮期
道之行位不滿德兮孰究其能遽焉退休兮詠歌太平
從者如雲兮視公儀型胡天之嗇兮奄然長征獨乘元
氣兮遨遊太清庶幾精英兮隨物流形凝為卿雲兮繁
為列星兮名弗泯兮千載猶生於乎懷公兮永以為徵
祭文

祭太保陽武侯薛祿文

追封鄆國公謚忠武

惟公之生夙負才略乘時奮興鳴劍橫槊公負剛勇義

膽忠肝為國靖難惟公桓桓感會之機雲龍風虎公所
自任惟忠與武天戈所向如霆如雷公冒矢石無堅弗
摧既清內難既奠邦國爵位超加有聲赫赫疆場有警
六師親征公為前驅沙漠肅清積勲累勞荐受褒典進
位師臣極于崇顯公結主知終始一心屹為柱石以身
自任爰城朔方爰度爰築亦既克完而公病篤還京入
朝力疾自陳賜藥命醫恩意益勤公宜少留湔爾遐棄
訃聞興嗟錫爵賜諡存歿哀榮如公幾人公死無憾失

茲老臣予輩交游同在朝列自公云亡孰不嗚咽爰潔一觴載陳以辭公靈如在尚其鑒之

祭宋駙馬琥文

惟公出自名閥器宇端厚昔在太宗選配貴主嘗命鎮撫西陲式副倚注繼命居守南京小心周密彌效勞勩既而閒居數載恪謹自守皇上用篤親親任以心膂而一疾弗支遽焉長往宸衷軫念所以眷禮於公者甚厚公可無憾矣某等辱在交游切深感悼馳詞致奠涕淚

交零靈爽如存尚祈歆鑒

祭僉都御史嚴升文

惟君有學有行早擢科第首為牧宰稱於其職繼僉外
憲改佐郡符入典郎署遂貳大理滋歷歲年益嚴操履
朝廷重耳目之寄陟僉憲臺自蒞職以來夙夜惟寅振
起紀綱剋決宿弊政令一新人用畏服夫何一疾遂以
不起凡在同朝皆為傷悼某等相望非邇弗獲躬赴緘
詞遠寄寓此一觴君尚有聞鑒此誠悃

祭兵部尚書張本文

惟公器宇清粹性行剛介負通敏之識蘊經濟之材始服官政宰邑有聞用登郡守遂叅大藩入佐冬官復贊邦刑敷歷中外聲譽咸彰操履之嚴始終一致仁考繼統之初急於用賢首擢公司馬皇上委任舊人益隆寵眷加授宮僚復命兼職地官公夙夜孜孜講求治理嘉言讜論日進于廷整飭兵政懲濫冒之失清理錢穀革欺漏之弊黽勉不懈一心為國上納其忠人服其公惠

利及於軍民事功著於朝廷方冀績效之成以副倚托
之重詎意一朝遂成永訣當寧興悼卹典有加凡在聞
知罔不傷感某等久同朝列契誼尤深忽此相失涕殞
心摧繼今欲承顏接辭以罄平生而音容日遠不可復
得矣一觴薦誠想公如在公其有知來格來歆

祭戶部尚書郭敦文

嗚呼公之器宇靜厚而凝峻公之德性孝友而謙和公
之存心處正而不阿公之持身厲操而不變方入仕之

秋遭聖明之日首登郎署繼任郡守用佐藩閫贊貳六
卿爰陞陟於地官遂總理於邦賦身任勤勞而不替心
懷忠鯁而不忘歷事四朝揆始終而一致踐履中外亶
清白而一心屬茲委任之隆宜享壽祿之富何一疾之
弗支竟逾月而不起九重為之興悼百僚為之惻傷某
等辱在交游久同朝列忽一朝而永訣與萬古而長辭
爰陳菲奠寓此哀忱惟公不亡庶其鑒之

祭胡學士光大文

贈資善大夫禮部尚書謚文穆

惟公之生器宇夙成粵自髫髻魁然有聲壯遊江湖襟
度洒落傲睨物表寄興寥廓繼登庠序學問益充如玉
斯琢如金在鎔射策決科蜚聲場屋一魁天下人望所
屬爰歷清要列官詞垣步武玉堂出入金門備承恩遇
眷顧益隆論思獻納夙夜在公掌帝之制溫純典雅雲
漢之光被于華夏黼黻鋪張皇猷日宣地位清切委任
尤專帝命時及賚錫繽紛繡衣象簡照耀青雲公既蒙
恩益勤厥職慎密小心靡間朝夕方期眉壽以享榮名

豈謂二豎倏焉相嬰薤露興歌九原不作聖情嗟悼百
僚駭愕卹典攸加褒贈愈厚公死無憾後世有耀顧惟
交游中心孔悲昔也同列今焉永辭旅櫬言還道路悠
邈睠茲故鄉寔是託臨政祖送涕泗其滂哀哉長訣
萬古一觴

祭兵部尚書陳洽文

鎮文趾歿于戰陣贈少師諡
忠節

惟公之生性行貞純忠謹謙和翼翼恂恂初以才薦首
列近侍繼典銓衡載職大理夙夜弗懈惟明惟公寔稱

委任仰副宸衷交人梗化肆造叛逆公贊元戎屢效勞
績閱歷二紀撫鎮炎陬累征不靖惟公懷憂寧橋之役
公謀既善彼拒弗納失在輕戰師徒為劒寇勢披猖惟
公秉義奮氣彌剛公蹈白刃如履平地一心為國有死
無貳孤忠偉節日月爭光凜凜英風振于遐荒公死如
歸國有懿典生著榮名歿尤光顯稽行錫謚恩卹有加
命子以官鸞誥寔華予忝交游夙敦情好公既永逝益
增悲悼有殺載俎有酒盈尊一觴致奠靈爽如存

祭駙馬都尉廣平侯袁容文

惟公出自勲閥選居戚里文皇靖難首效勞動翼贊城
守設施有方用濟艱虞茂膺褒錫榮貴三世肆加恩數
遂董督府以贊軍政從容慎密廉公寬和親賢樂善文
雅恂恂不矜于己不驕于人方茲委任期輔邦家胡茲
一疾奄然而逝遠邇嗟悼中外盡傷某等叨同朝列咸
切哀痛九原日遠瞻望無由有潔其觴有楚其豆庶鑒
于誠歆此一奠

祭胡學士文

惟公負剛介之資抱明敏之識學究乎天人才高乎時
俗早發身於科第遂敷歷於清華出入乎金馬玉堂之
間翱翔乎紫禁青雲之上論制作則黼黻乎皇猷備顧
問則屢承於寵眷歷覽兩京載筆累陪于扈從馳驅沙
漠服勤兩事於北征既屢躡於華階亦荐蒙於褒賜斯
文為之倚望朝廷為之屬心顧年齒未登於五十而筋
力正及於康強胡大限之俄窮遂九原之不復聖上軫

不慙之悲百僚興云亡之嘆雖卹典之加迫超于古昔
而死生之感不盡于心私嗚呼哀哉公其往矣自今不
可以復見矣瞻靈柩之南還悵雲山之遼邈爰敬奠于
一觴痛永訣乎千古

祭周處士宗坦文

以逮對憲臺得直將南歸病卒
于官舍

嗚呼周君其所蘊者仁義忠厚之德其所見者冲和雅
粹之容其所負者英偉豪邁之氣其所尚者高蹈肥遯
之風播芳聲於鄉郡垂典則於名宗仗先塋之大義秉

尊祖之至公上京華以遊覽歷川岳之奇雄何高情偉
志之弗遂奄焉一疾以令終嗟善人之不淑慨天道之
夢夢視浮生於一瞬寔今古之所同其所貴者身後令
名之不泯況壽年福履之兼隆諒仙遊九地以奚憾悵
親交一見而無從邈音容之杳杳積予心之忡忡瞻旅
櫬之南旋渺雲山之萬重持薄奠以攄哀靈彷彿兮來
降嗚呼周君尚享

祭夫人劉氏文

憶自洪武庚辰之春予以薦赴南宮忝官近侍其冬即迎致夫人京師以就祿食未幾遭值國艱深切憂怖賴祖宗之佑幸以無虞既而荷先帝選用儒雅授職翰林逮永樂己丑之春承命扈從北巡明年從征於北以其冬還京歲癸巳復扈從北巡明年再征於北夫人以十三年挈家歸鄉里十四年冬予還自北京夫人復攜二女來會十五年春車駕再幸北京予又從行而夫人復以是秋歸數年之間南北往來與夫人聚處者無幾去

年春得大鵬書言夫人將買舟來北京聞之喜不自勝
適其夏值予復有北征之行至秋八月始還京而夫人
乃以五月十四日得暴疾而卒嗚呼痛哉夫人之病也
吾不得視藥歿也吾不得臨訣殯也吾不得臨棺祭又
不得以時嗚呼痛哉思惟夫人慈仁之德勤儉之行而
不能相與偕老於百年使吾一旦失賢妻吾母失賢婦
而諸子失賢母嗚呼痛哉比者聖天子蒞阼之初嘉念
舊人蒙恩擢居保傅官列二品夫人亦荷二品鸞誥之

封帝命下臨獨不得目視其榮早日子孫滿前綵衣後
先跪拜笑嘻奉觴稱壽和氣滿堂何樂如之今吾之歸
諸子諸女諸孫皆在獨不見夫人嗚呼痛哉奈何哀哉
奈何歲月逾邁夫人去世又已周朞而一坏未卜停棺
在堂此實予責今將赴京已令諸子卜宅兆俟今冬安
厝夫人夫人其尚鑒予誠一觴致奠涕淚交零中心梗
塞痛何可言

祭弟幼孝十郎文

嗚呼吾弟命止此耶吾弟聰明磊落襟度秀爽脫畧不
羈傲睨物表誦詩讀書操觚染翰銳敏精勤超然獨得
孝親敬兄交友接物周密詳審曲盡人情理家治生創
基治產相時經營咸適其宜公直廉介忠恕明信先義
後利服于鄉閭英英之氣挺挺之識浩然之志獨步前
驅方期有為如古之人繼志述事以裕厥後夫何一旦
困于二豎奄忽長逝竟不可知於乎吾弟命果如斯賢
若顏子尚嗇于壽雖在後世壽夭窮通此理一致抑又

何疑況以吾弟明決自信臨終之言炳炳琅琅洞視古今中心坦然知命不懼視死如歸力疾據几援筆大書告以後事略無忌諱且命吾子再三寄聲死生訣別萬古無期惟此孤幼托之于兄提攜教育冀其成立庶幾九泉瞑目無憾於乎吾弟言及于此終古之痛何以克堪兄於吾弟情深義篤幽明之間敢負斯言憶自曩歲弟來省問兄從北征未及相見弟乃留此待兄之歸惟秋七月還自塞北詞林一見悲喜交集握手勤拳如解


飢渴曾未逾月弟復告歸臨岐一別愴咽無言日月逾邁南北睽離十載之間如隔夢寐謂宜再見敘我情親豈期一朝遂成永訣於乎哀哉兄於吾弟病弗克視藥斂不及撫棺葬不及執紼祭不及以時號哭天涯永恨何追於乎哀哉人世百年寄此一瞬萬生擾擾終歸於盡吾弟雖歿幸有賢子長者奮立克振門戶幼亦穎發不在人後殆天所畀以報吾弟惟弟不亡視此後人彼或壽考嗣續無傳歿同埃燼寂焉無聞兄視吾弟生既

有立歿復有傳雖云蚤世無復遺憾於乎哀哉兄仕于朝二十餘年骨肉疎濶會少別多終冀歸老共樂丘園天胡不弔奪我賢弟命不可知遽至於此於乎哀哉我言有盡我思無時我淚有盡我恨無窮緘詞萬里以寫我悲弟其有知鑒此深情

祭亡兄季質弟季緘幼子幼孝文

幼孜竊祿于朝垂三十載骨肉手足之情無日不惓惓于懷然尚冀會合有時庶少叙天倫之樂以慰久別契

聞之私豈意諸兄弟數年之間皆相繼亡歿南北迢遞
竟成永訣嗚呼哀哉吾於諸兄弟病弗能視湯藥歿弗
能與殯殮葬弗能執紼以臨窆窆祭弗得以時終古之
憾其何能釋茲者荷蒙聖恩封贈先世幸得歸省子家
拜吾母見吾子孫族人見吾鄉里親識朋友獨不得見
吾兄吾弟呼天叫地五內摧裂嗚呼子言有盡子恨無
窮子淚有盡子悲無窮用致薄奠以寫子誠惟靈不昧
來享於斯



金文靖集卷十